

01/02/1997

20 pusat hiburan sarang Ecstasy

KUALA LUMPUR, Jumaat - Jabatan Narkotik Polis Diraja Malaysia mengesan lebih 20 pusat hiburan malam yang dijadikan tempat kegiatan pengedaran dan penagihan pil khayal ecstasy oleh pengunjung.

Timbalan Menteri Dalam Negeri, Ong Ka Ting, berkata pusat hiburan terbabit dikesan dalam operasi penguatkuasaan terhadap premis yang disyaki menjadi pusat pengedaran dan penagihan pil itu, baru-baru ini.

"Pihak berkuasa akan meningkatkan pemeriksaan ke semua tempat hiburan yang disyaki terbabit bagi memerangi masalah penagihan dan pengedaran pil ecstasy yang kebanyakannya membabitkan remaja," katanya kepada pemberita hari ini.

Sebelum itu, beliau menerima kunjungan dan mengadakan perbincangan mengenai masalah penggunaan pil khayal dengan Pemuda MCA Selangor yang turut mengemukakan memorandum mengenainya.

Antara lain memorandum itu menggesa kerajaan mengenakan hukuman lebih berat terhadap pengedar pil ecstasy dan menjalankan langkah penguatkuasaan sepanjang tahun.

Ong berkata, kerajaan tidak akan bertolak ansur terhadap pengusaha pusat hiburan yang membiarkan premis mereka digunakan bagi kegiatan pengedaran dan penagihan pil ecstasy.

"Kita akan guna semua undang-undang yang ada termasuk Langkah-Langkah Pencegahan Khas selain menggubal undang-undang baru seperti diumumkan oleh Datuk Seri Dr Mahathir Mohamad semalam," katanya.

Perdana Menteri semalam berkata kerajaan akan menggubal undang-undang bagi membolehkan pemilik dan pengusaha pusat hiburan didakwa sebagai pengedar jika pengunjung menjadikan premis tempat pengedaran dan penagihan.

Undang-undang itu bertujuan mencegah kegiatan penagihan dan pengedaran dadah terutama pil psikotropik jenis ecstasy.

(END)